

ឧបត្ថម្ភ

AWIG - AWIG

ក្រុមប្រឹក្សាធម្មនុញ្ញ ឃុំបាត់ដំបង


DESA PAKRAMAN MADANGAN KAJA

ភ្នំពេញ ខេត្តកណ្តាល

KECAMATAN GIANYAR TAHUN 1999

ភ្នំពេញ ខេត្តកណ្តាល

KAPARIPURNAYANG TAHUN 2017



ក្រុមប្រឹក្សាធម្មនុញ្ញ  
KABUPATEN GIANYAR

ខេត្តកណ្តាល

2017



Artos Niyasa/Prelambang :

1. Bucu Lima : Maka cihna Pancasila, sane dados dasar Negara Indonesia, saha Panca Sradha maka pamikukuh Agama Hindu.
2. Swastika : Setata nginggilang kepatutan medasar antuk Dharma.
3. Meru Tumpang Tiga : Ulangan kayun ngarcana Ida Sang Hyang Widhi Wasa sane maprabawa Sang Hyang Tri Purusa (Parama Siwa, Sadha Siwa, Siwatma) saha Tri Murti (Brahma, Wisnu, Siwa).
4. Padi Kapas : Nyujur kesuburan (Gemah ripah) sane dados tetujon sareng sami.
5. Bunter Tiga : Nincapang pasikian Krama, sane kadasarin antuk Tri-Hita Karana.
6. Tunjung : Rikala maprawerti medasar kasucian (Satya) nyujur patitits.
7. Pondasi/Dasar : Kukuh melanin wewidangan Desa mangda Asri lan Lestari.
8. Usaha Dharma Bala Krama : Eling ring usaha lan swadharma soang-soang Krama.

**P I D A G I N G**  
**MAKA BANTANG AWIG-AWIG DESA PAKRAMAN**  
**MADANGAN KAJA**

PRELAMBANG .....	i
MAKA BANTANG AWIG-AWIG.....	ii
MURDHA – CITTA .....	1
PRATHAMAS SARGAH ARAN LAN WEWIDANGAN DESA .....	1
DWITYAS SARGAH PATITIS LAN PAMIKUKUH.....	2
TRITYAS SARGA SUKERTA TATA PAKRAMAN.....	3
Palet 1 Indik Krama.....	3
Palet 2 Indik Prajuru/Dulun Desa .....	4
Palet 3 Indik Kulkul .....	8
Palet 4 Indik Paruman .....	9
Palet 5 Indik Druwen Desa.....	11
Palet 6 Sukerta Pamitegep .....	12
Kaping 1 Karang, Tegal, lan Carik.....	12
Kaping 2 Pepayonan .....	13
Kaping 3 Wewangunan.....	15
Kaping 4 Wewalungan.....	16
Kaping 5 Bhaya .....	17
Kaping 6 Panyanggran Banjar .....	18
CATHURTAS SARGAH SUKERTA TATA AGAMA.....	19
Palet 1 Indik Dewa Yadnya .....	19
Palet 2 Indik Resi Yadnya .....	24
Palet 3 Indik Pitra Yadnya.....	25
Palet 4 Indik Manusia Yadnya .....	35

Palet 5 Indik Bhuta Yadnya .....	36
PANCAMA SARGAH SUKERTA TATA PAWONGAN.....	37
Palet 1 Indik Pawiwahan .....	37
Palet 2 Indik Nyapian .....	40
Palet 3 Indik Sentana .....	41
Palet 4 Indik Warisan .....	43
SAD SARGAH WICARA LAN PAMIDANDA .....	46
Palet 1 Indik Wicara.....	46
Palet 2 Indik Pamidanda.....	47
SAPTAMA SARGAH NGUAH NGUWUHIN AWIG-AWIG .....	49
ASTAMA SARGAH SAMAPTA .....	50

## MURDHA CITTA

"OM SWASTYASTU, OM AWIRIGNAMASTU NAMA SIDAAM"

Meluripun pungguyunging Ida Sang Hyang Widhi Wasa, Agung Kerta Nupriha ngawentenang kaburipun sekala niskala, ring Bhuwana Agung lan Bhuwana Alit, Manut Dresta desane wantah pawakan pasayuban krama Desa rawuhing kula warga pawonganya. Desane kemanggehang Bhuwana Agung, pawonganya sowang-sowang pitaka Bhuwana Alit.

Sotarin Bhuwana Agung desane wantah pawakan Bhawa maurip, jangkap saha Tri Hita Karanyu, lawir :

la. Parahyangan, sahananing kabhyangan, panyiwian desa genah ngarcama Ida Hyang Parama Wisesa, maka jiwun desane

ra. Pawongan, krama saha warga desa maka sami pawakan Bayu Pramana (Tri Kaya) mawinan desane sida molah maprawerti

ca. Palemahan, tanah kakawuhan desa, sinaggeh stula sariruning desa Agung patemon bhuwana alit lan agung, larapan santa jagadhita, sinaggeh mardhaning prayojana pangriptaning Awig-awig Desa Pakraman ring sabha krama Desa Pakraman Madangan Kaja.

Pamutus sabha imucap pinaka seput ulu-ulu pamutus, wastu prasida prayojanan mamikabeh prasama nglahap mowah amagohaken kadi linging Awig-awig iki.

## PRATHAMAS SARGAH

### ARAN LAN WEWIDANGAN DESA

#### Pawis 1

- (1) Desa Pakraman punika mawasta Desa Pakraman Madangan Kaja.
- (2) Jetha kakawuh wewidangan mawasta nguloh
  - la. Watu sas kangin Desa Pakraman Agung Buhgi,
  - ra. Watu sas kidul Desa Pakraman Madangan Kertal,
  - ca. Watu sas Kawah Desa Pakraman Bonyuh,
  - ra. Watu sas Kaja Desa Pakraman Dalpadan.

- ra. Wates sisi Kaja Desa Pakraman Padpadan;
- (3) Desa Pakraman puniki kawangun antuk seket siya (59) song karang ayahan  
Desa miwah karang gunakaya wantah asiki banjar turmaning kaepah dados  
3 (Tigang) tempek luwire :
- ha. Tempek Kangin  
na. Tempek Kelod  
ca. Tempek Kauh

**DWITYAS SARGAH**  
**PATITIS LAN PAMIKUKUH**

**Pawos 2**

Desa Pakraman Madangan Kaja ngamanggehang pamikukuh minakadi :

- (1) Pancasila;
- (2) Undang Undang Dasar 1945, pamekas pasal 18B ayat 2;
- (3) Undang Undang No.39 Tahun 1999 tentang HAM;
- (4) Perda Provinsi Bali No. 3 Tahun 2001 tentang Desa Pakraman telah diubah dengan Perda Provinsi Bali No 3 Tahun 2003 tentang Desa Pakraman;
- (5) Tri Hita karena manut sadacara Agama Hindu

**Pawos 3**

Luir patitis Desa Pakraman Madangan Kaja:

- (1) Ngukukuhin miwah ngarajegang Sang Hyang Agama;
- (2) Nginggilan tata prawretine maagama Hindu;
- (3) Ngarajegang kasukertan desa saha pawongannya sakala lan niskala.

**TRITYAS SARGAH**  
**SUKERTA TATA PAKRAMAN**

**Palet 1**

**INDIK KRAMA**

**Pawos 4**

- (1) Sane kabawos Krama Desa inggih punika kulawarga sane maagama Hindu Saha ngamong karang desa utawi karang gunakaya;
- (2) Sajaba punika kabaos Krama Tmiu lan Tamiu :
- (3) Sane kabaos Krama Tamiu inggih punika warga sane maagama Hindu mawit saking dura desa jumenek ring Desa Pakraman Madangan Kaja;
- (4) Sane kabaos tamiu inggih punika warga sane tan maagama Hindu mawit saking dura desa jumenek ring Desa Madangan Kaja;
- (5) Indik Krama Tamiu lan Tamiu selanturnya manut pararem.

**Pawos 5**

Krama Desa Pakraman Madangan Kaja wenten 4 (petang) pawos luwire:

- (1) Krama ngarep, kulawarga sane ngamong karang desa utawi karang gunakaya;
- (2) Krama Balu Angkep pangele kulawarga sane tanpa karang nanging sampun mawiwaha kabawos krama banjar patus/Pangele;
- (3) Krama balu, kulawarga sane katinggal seda olih lanang utawi istrinnyane utawi sangkaning nyapihan;
- (4) Krama Tapukan, kulawarga manut angka (1) ring ajeng sakewanten durung antes ngayah.

**Pawos 6**

Ngawit dados Krama Desa :

ha. Ngawit ngamong karang;

na. Krama Tamiu sane mapangarsa dados Krama Desa manut pararem kadulurin antuk pinunas ring Prajuru Desa. Sangkaning Tamiyu jenek ring Desa Pakraman Madangan Kaja manut Pararem;

#### **Pawos 7**

Galah tedun makrama Desa:

- ha. Nyantos Buda Kliwon Dunggulan mawit saking pawiwahan;
- na. Mawit saking Krama Tamiu, sesampune pinunasnyane kaingkupin olih paruman Krama Desa.

#### **Pawos 8**

Sahanan Krama Desa keni tategenan (ayah muah urunan)luwire:

- ha. Krama pangarep keni urunan miwah ayahan mamungkul mangge ring desa wiadin ring banjar;
- na. Krama balu Angkep keni ayahan mamungkul mangge ring banjar kawentenanya, ring kahyangan tiga krama balu angkep keni urunan wawangunan manut pararem;
- ca. Krama Balu dagingne mamungkul ayahan manut kebaluan nyane manut pararem;
- ra. Krama Tapukan keni urunan mamungkul sakewanten ayah-ayahannya kaluputan selami dereng antes ngayah, risampune mayusa pitulas (17) warsa sampun kapatutan ngayah;
- ka. Parade rikalaning ngayah, wenten sinalih tunggil krama matilar tan pasadok, sadurung puput karya wenang krama inucap keni pamidanda manut pararem tanjek laler kewastanin.

#### **Pawos 9**

Swadharma Krama, sewosan ring tategenan, luwire :

- ha. Tinut saturut ring sedaging awig-awig, pararem lan paswaran Desa ;

m. Tawar maneh ngutusdabayang manggala desane urusidibayang ayujur manut patitis.

#### Pawon 10

Prade wenten Krana Tamiya teulu dilalis krana desa patut bayur rekadi ur-  
paniki.

ln. Nowar panilaga manut padrawent Krana Desa wong-wong sane wenten  
ring kas desa.

m. Nowar pangantepel manut parawent.

Swadharman Krana Tamiu lan Tamiu lawite:

- 1) Tawar naturat ring yasa kerita desane san piwal ring sadaging awig-  
awig parawent lan parawent desa.
- 2) Nyadokan raga ring parajura arakita (24 jam) sesampun jamenek  
malerapan untuk dilalis paritika saking desane utawi sang  
ngawawenang.
- 3) Yasa san turut pacang kareal san kadahsan jamenek ring desa.

#### Pawon 11

Dialih tanggil krana desa/Desa/Desa hulu lahang utawi istri patut kaluputan  
lawite.

ln. Yasa hulu lahang, hapat ayub san sadani pinakarya hulu dereng antea  
ngayuh.

m. Yasa hulu istri, hapat ayub lahang sadani pinakarya muani dereng antea  
ngayuh.

ca. Krana Desa san kaputusan teulu ngayuh sanu huyut, makit da, ayub,  
hulu, hulu, rupa, rupa sadani sadani.

#### Pawon 12

Krana Desa kadahsaning lawite.

ln. Mampangtal dawa san teulu sadani.

- 1) Mampangtal.
- 2) Mampangtal kaluwaga wongkai.

3) Kaluasan.

- na. Kecap ring ajeng kengin matempo wantah apisan, sajawanin wenten uwakan Prajuru;
- ca. Nyada mapiteges kulawarga Desa sane sampun mayusa Pitung dasa (70) warsa/tan keni ayah tur tan dados nyuksukin, sang nyada mangda digelis ngarereh penyeledihi manut pararem.

### **Pawos 13**

Wusan dados krama Desa:

- ha. Sangkaning magingsir genah kadura desa utawi ngelangkungin segara, krama punika patut nunas panglugrahan saking prajuru tur tan polih pahpahan saking druwen Desa Prade Riwekas matulak malih ngeranjing makrama desa, yan sangkaning rahayu kadadosang tur kakenenin pananjung batu manut pararem;
- na. Sampun wenten sumendi (sumendya, kasemseman);
- ca. Pinunas ngraga saantukan sungkan-sungkanan;
- ra. Sangkaning kanoroyang, duwaning tan prasida ngesehing solah maprewerti setata nguwug pamargi awig-awig dados mawali malih yan sampun prasida muntasang dadendan manut pararem.

### **Palet 2**

## **INDIK PRAJURU/DULUN DESA**

### **Pawos 14**

- 1. Desa Pakraman Madangan Kaja kaenter antuk Bendesa Adat.
- 2. Banjar kaenter antuk Klian Banjar
- 3. Bendesa lan Klian banjar patut :
  - ha. Mawiwit sakeng Krama ngarep miwah Balu Angkep lan kajangkepin antuk:

- 1) Uning ngwacen lan nyurat aksara latin lan Bali;
  - 2) Uning ring tata titining mawa Desa;
  - 3) Uning ring pariindikan Agama lan Adat;
  - 4) Lascarya ngayah tur madruwe parilaksana sane rahayu;
- na. Kaadegang malarapan antuk pamilihan/kacatri olih paruman Krama Desa nyabran 5 (limang) warsa, yan sampun puput wanengan ngayah dados kapilih malih wantah apisan.
- ca. Maduluran Upasaksi ring silih tunggil Pura Khayangan Tiga ring Desa Pakraman Madangan Kaja.

#### **Pawos 15**

1. Bendesa Pakraman kasangga olih :
  - ha. Patajuh pinaka wakilnya.
  - na. Panyarikan pinaka juru surat.
  - ca. Patengen utawi juru raksa pinaka pangamong druwen desa.
  - ra. Kasinoman pinaka juru arah, akehnya manut babuatan magilir nyabran 6 sasih.

#### **Pawos 16**

Swadharmaning Bendesa Pakraman luwire :

- ha. Ngenterang palaksana sadaging awig-awig miwah pararem desa;
- na. Ngenterang krama rawuhing warga desa ngupadi manut patitis;
- ca. Mawosin kalih niwakang pamutus arep ring wicara warga desa;
- ra. Maka duta desa matemuang bawos ring sapisira ugi.

#### **Pawos 17**

Patias utawi olih-olihan prajuru desa:

- ha. Luput rerampen (papeson);

- na. Polih tanding tengah (cenengan);
- ca. Polih separo upon-upon carik, laba mawit saking ngaryaning;
- ra. Patias sewosan manut pararem.

### **Pawos 18**

Prajuru Desa/Banjar kagentosin riantukan :

- ha. Seda;
- na. Wit saking pikayun rahayu mapinunas uwusan seantukan pacang kesah kadura desa utawi ngelangkungin sagara;
- ca. Ngentosin prajuru desa/banjar patut sajeroning paruman tur kaingkupin olih krama desa/banjar sami;
- ra. Prade iwang pamargi/ nilar sesana.

### **Palet 3**

## **INDIK KULKUL**

### **Paos 19**

- (1) Kulkul sane wenten ring Desa Pakraman Madangan Kaja luwire :
  - ha. Kulkul Desa/ kulkul kahyangan Desa;
  - na. Kulkul Banjar;
  - ca. Kulkul Sekaa-sekaa
- (2) Tabuh tatepakan kulkul Desa/Banjar :
  - ha. Atulud bulus tengeran kageni bhaya;
  - na. Duang tulud bulus tengeran kapandung;
  - ca. Tigang tuludan bulus tengeran wenten jatma ngamuk;
  - ra. Tigang klentungan ngawangdeyang makarya;
  - ka. Sia klentungan tengeran kalayu sekaran;

- da. Atulud banban tengeran nedunang desa/banjar cihna wenten pakaryan;
- ta. Tabuh tiga ngempang, indik pawiwahan;
- sa. Tabuh lima ngempang cihna wenten surya graha (bulan kapangan);
- wa. Tabuh pat bulus kacihnayang wenten linuh.

#### **Pawos 20**

- (1) Kukul desa/banjar katepak :
  - ha. Yan sangkaning pituduh prajuru desa/banjar;
  - na. Sajawaning tengeran bhaya tan ngantos pituduh prajuru;
  - ca. Yan prade wenten warga desa/banjar sane nepak kukul tan sangkaning pituduh prajuru, patut digelis supeksa maka buatan panepake, yan sapunika wenang sang mamurug kadanda manut pararem.
- (2) Kukul sekaa-sekaa miwah kukul paumahan ping kalih pondokan tan kalugra :
  - ha. Nyawerin (matchin) sukat utawi suaran kukul desa/banjar sajawaning bhaya;
  - na. Prade wenten sane mamurug patut kadanda manut pararem.

#### **Palet 4**

### **INDIK PARUMAN**

#### **Pawos 21**

- (1) Paruman/sangkepan ring Desa Pakraman Madangan Kaja, wenten :
  - ha. Paruman/sangkepan Desa, kawentenang :
    - 1) Nyabran sasih tanpa arah-arah duaning sampun tetep panemayane, rikala rahina Wraspati Umanis;
    - 2) Napkala, makajalaran arah-arahan manut tatujon.

ha. Sangkepan Prajuru Desa kawentenang manut bebuatan;  
na. Paruman/sangkep sekaa-sekaa manut bebuatan.

(2) Paruman Desa Madangan Kaja madudonan sekadi ring sor:

ha. Prasida lumaksana risampune kateduning olih sang patut ngamiletin separo langkung asiki;  
na. Sang ngamiletin paruman patut ngangge busana adat madya tur malinggih rikala sampun paparuman kakawitin;  
ca. Tan kalugra makta gegawan saha luwirnye;  
ra. Tan maren mangarcana ring Ida Bhagawan Panyarikan, maka sarana upakara cane sane kabakta olih sinoman soang-soang;  
ka. Maka sarana janggi utawi jam pangawit kalaksanayang panyacak sep-sepan saha riwusnia nyacak dadosan agung alit manut pararem;  
da. Tan kalugra, ngametuang suara gora utawi biyota, utawi iyeg yan wenten asapunika keni pamidanda biya pacamil manut pararem;  
ta. Prade sinalih tunggil sinoman tan makta cane ritakalaning parum sinoman punika patut keni pamidanda manut pararem.

(3) Prade pidaging paruman tan kaingkupin, mangda prajuru desa/banjar ngilikang babawos, saha pamutusanya mangda kararemin olih krama Desa, bilih tan prasida kaingkupin jantos ping tiga, Prajuru wenang nunas bawos ring Sang Ngawa Wenang.

## Pawos 22

(1) Sajeroning paruman Desa, Bendesa patut nyobyahang/ nyiarang sapamargin ngenterang desa, pamekas ngeninin pariindik:

ha. Munjuk lungsur ring pakraman saha ayah-ayahan, sulur Arta berana, druwen desa;  
na. Rencana Prajuru ngeninin usaha desa kapungkur.

- (2) Pamutus paruman desa sinanggeh pararem maka pamitegep daging awig-awig.

### **Pawos 23**

- (1) Sangkepan prajuru Desa kawenangan wantah ngarincikang pangrencana usaha Desa kapungkur.
- (2) Sangkepan prajuru Desa tan kawenang ngamedalang tategenan ring Krama, sadereng kaingkupin olih krama Desa.
- (3) Pamutus sangkepan Prajuru Desa/Banjar ngewetuang paswara, maka pidaging pituduh sang ngawewenang utawi ngonekang pecak paruman krama desa

### **Palet 5**

## **INDIK DRUWEN DESA**

### **Pawos 24**

Padruwen Desa Desa Pakraman Madangan Kaja sakadi ring sor :

ha. Kahyangan Desa luwire :

- 1) Kahyangan Tiga
  - Pura Desa/Penataran;
  - Pura Bale Agung;
  - Pura Dalem lan Prajapati.
- 2) Pura Melanting;
- 3) Pura Masceti;
- 4) Pura Gunung Mertha.

na. Bale Banjar Madangan Kaja

ca. Palaba Pura miwah carik lan tegal manut ilikita sang ngawa wenang;

ra. Setra Desa Pakraman Madangan Kaja;

ka. Lelanguan minakadi tatabuhan lan ilen-ilen luire:

- 1) Gong Druwen Desa Pakraman;
- 2) Ilen-ilen wali ring pura sekadi Rejang lan pendet

da. Miwah Padruwen Desa tiyosan;

ta. LPD lan Koperasi.

### **Pawos 25**

Pioli-oliha Desa Pakraman Madangan Kaja luire :

- ha. Pamupon laba pura ;
- na. Tiyosan sane lian manut pararem ;
- ca. Sarin Canang ;
- ra. Paica saking guru wisesa, lan sane siosan sane patut.
- Ka. Batin LPD lan Koperasi.

### **Pawos 26**

Prajuru Desa patut :

- ha. Ngetangang/ngenterang pamupon laba pura lan salwiring druwen Desa.
- na. Pikoli lan pamuponnya kaanggen prabeya wawangunan saha piodalan ring kahyangan Desa.
- ca. Nyabran pasangkepan Desa/Banjar prajuru pangamong druwen desa patut nyinahang parindikan unjuk lungsuring padruwen Krama Desa.
- ra. Salwiring padruwen Desa patut wenten ilikitannya.
- ka. Tan kalugra ngadol utawi ngesahang padruwen desa yan tan kaingkupin olih Krama Desa ring paruman.

### **Palet 6**

## **SUKERTA PAMITEGEP**

### **Kaping 1**

## **KARANG, TEGAL LAN CARIK**

### **Pawos 27**

Krama Desa pangamong (ngalinggihin) Karang patut tembok utawi:

- ha. Ngewatesin karang inucap antuk pagehan endong, pucuk, bluntas mangda pakentenanya asri.
- na. Wates sisi kaler miwah kangin patut kakaryanin olih sang ngamong karang sane mawasta gegaleng kaluan.
- ca. Prade karasayang pagehan turus inucap ngalikadin yan pada arsa panyandinge, kengin watese nganggen pinget kewanten, kasaksinin olih Prajuru Desa.
- ra. Prade wenten karang kabebeng (embet) mangda kautsahayang margine manut paigum lan pararem.

### **Pawos 28**

- (1) Sinalih tunggil krama desa tan kalugra Ngalah-ngalah margi, tegal, karang, carik, anak tiyosan.
- (2) Ngalah-ngalah tanah linggih kahyangan, tegak setra miwah sakancan linggih sane sinanggeh tanah suci.
- (3) Prade wenten mamurug kecap ring ajeng, sang ngalalah wenang ngawaliang tanah inucap saha keni pamidanda sapatutnyane manut pararem kadulurin upakara pangalalah tanah suci.
- (4) Krama Desa/Banjar patut ngaryanin got ring ajeng telajakan suang-suang.

### **Kaping 2**

#### **PAPAYONAN**

### **Pawos 29**

- (1) Ngawit nandur papayonan tanem tuwuh patut adepa agung (2,5 meter) ngajeroang saking wates, prade jantos ngaliwat wates, dados kasepat gantungin.

- (2) Yening wenten tatanduran ngungkulin, samaliha mawastu mayanin kapisaga patut kawara antuk paiguman riin, mangda sang madruwe wit ngarebah utawi notor.
- (3) Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring prajuru tur risampun kaparitas/malungguhing sang nruwenang wit inucap saha ngicenin tempo (galah) tigang rahina mangda karebah utawi katotor wit punika.
- (4) Krama Desa patut ngemanggehang kawerdian tanem tuwuh sane ngawinang desane asri.

### Pawos 30

- (1) Prabia lan panyangaskara ring wawangunan sang karubuhan inggih punika :
  - ha. Sadurung lintang pawanengan/temponya saking prajuru prade wit punika rebah tur mayanin sang madruwe wit luput ring kaiwangan sakewanten wit punika kabukti (kaambil) olih sang keni karubuhan;
  - na. Prade sampun lintang pawanengan/temponya mawastu empak utawi rebah wit punika tur mayanin/ngarubuhin wawangunan anak tiyosan, wit punika kabukti (kaambil) olih sang keni karubuhan;
  - ca. Yan prade wenten wit (pamulan-mulan) rebah wiyadin empak malarapan antuk ganjih, nenggel, saha mayanin wewangunan anak liyanan sang madrebe wit punika patut negen prabia wawangunan miwah upakara pamrascita karang.
  - ra. Prade wenten wit rebah wiyadin empak, malarapan antuk, tan ganjih, berek, nenggel, mayanin wewangunan anak liyan sang madrebe wit luput saking kaiwangan, sakewanten wit punika atenga/saparo kabukti olih sang kasengkalan.

- (2) Ritatkala notor, munggel (mamunggul) wiyadin ngebah wit punika raris ngarebahin wawangunan anak liyan, sang notor munggul wiyadin ngebah punika patut negen sekancan karusakan miwah prabia upakarnya.
- (3) Yen wenten wit mentik ring wates kepah dados tiga :
- ha. Asiki ke Desa;
  - na. Asiki ke sane maduwe;
  - ca. Asiki ke penyanding.

### **Kaping 3**

## **WEWANGUNAN**

### **Pawos 31**

- (1) Tan kawenang ngewangun ring nampek pelinggih pura; mekadi café, penginapan, massas utawi hotel, wewatesan satus depa (100 meter) sisi kangin, sisi kauh, sisi kelod lan sisi kaja.
- (2) Nyabran ngwangun patut :
- ha. Masadok ring prajuru, ping ajeng prade wawangunan inucap ngeninin wates;
  - na. Ngangge sukat asta bumi miwah gagulak Asta Kosala Kosali, sanistane manut ring patitis niskala;
  - ca. Tan ngayubin (ngungkulin) kapisaga;
  - ra. Prade wenten wawangunan jantos nayubin, bilih-bilih temboke ring telengin wates, risampune kawara tur kasadokang ring prajuru wenang kadanda manut pararem saha tembok inucap kagubar utawi sanistane mangda kakaryanin abangan.
- (3) Sajaba toyan sabeh ikrama tan kalugra:
- ha. Ngembahang toya wit saking badan bawi, jempeng/kakus, pasiraman, pawaregan kapakarangan anak liyan/pisaga;

- na. Ngentungan lulu kajelinjingane, kapakarangan anak liyan, kamargi, katukade kadanda manut pararem;
- ca. Tan dados nanem sagu, ngalogor bebek, mabacin ring jlinjingan utawi telabah.

#### Kaping 4

### WEWALUNGAN

#### Pawos 32

- (1) Sahananing warga desa sane mamiara wawalungan patut sayaga ngalogor, negul mangda tan ngarusakin karang utawi pabianan krama tiyos, bilih-bilih jantos ngaranjing ngaletihin kahyangan.
- (2) Prade wenten wawalungan malumbar utawi ngeleb patut :
  - ha. Yan prade malumbar utawi ngangon ring margine risampune kawara patut kataban manut pararem;
  - na. Dadendan punika mabagi dados kalih atenga sang naban atenga ngeranjing ring banjar;
  - ca. Yan prade malumbar utami ngeleb jantos ngarusak pakarangan/pabyan krama tiyos, risampune kaware patut sang maderbe wawalungan kadanda ngewaliang wit sane karusak saha nebas papiaraan tetaban manut ring ajeng;
  - ra. Yan prade wawalungan sane ngeleb katutburi pramangkin olih sang madrebe wawalungan punika, sang madrebe wawalungan luput saking kaiwangan.
- (3) Prade jantos ngaletihin linggih suci, minakadi pamrajan, risampun kaparitatas olih Prajuru, wenang sang nruwenang kadanda mabuhu agung (caru eka sata, maduluran tebasan prayascita durmanggala), miwah tiyosan manut pararem.

- (4) Prade jantos ngaletchin kahyangan tiga, pura pamaksan risampune kaparitatas olih prajuru Desa/Banjar, wenang sang madrebe wewalungan punika kadanda mabuhu antuk Panca Sata makerep itik belang kalung.
- (5) Krama desa patut nyanggra wewalungan miwah sarwa prani, tan kapatutang ngamademang paksi miwah nuba ulam. Prade wenten sane tiwal, keni pamidanda manut pararem tur kaaturang ring sang ngawawenang.

### Kaping 5

### B H A Y A

### Pawos 33

- (1) Pari indik baya luwire :
  - ha. Jiwa bhaya;
  - na. Arta bhaya;
  - ca. Dura cara ring agama.
- (2) Yan prade sinalih tunggil krama desa manggihin jiwa bhaya patut:
  - ha. Sang manggihin kahanan jiwa bhaya, patut nepak kulkul bulus tigang tuludan mapitulung ring sang keni jiwa bhaya.
  - na. Prade ring desa kahanan jiwa bhaya patut i krama desa ngaturang bhuta yadnya tur sang mayanin katur ring sang ngawawenang.
- (3) Prade wenten jatma mamisuh utawi nguman-uman jatma tiyos, keni pamidanda prabca pacamil tebasan prayascita miwah runtutannya.
- (4) Sang manggihin kahanan artha bhaya (kamalingan), patut ngukul duang tuludan bulus tan nyantos pituduh prajuru desa/banjar sane pacang nimbangan.
- (5) Yan prade sang ngalaksanayang maling risampun sinah mabukti mamaling (wenten tri saksi inggih punika bukti, saksi, ilikita), i krama malaksana mamaling punika patut kakeninon pamidanda manut pararem saha

maweweh penyanggas kara prade i krama /jatma ngamaling barang sinanggeh suci tur ipun kaaturang ring sang ngawa wenang.

- (6) Pratingkahe mapailon ring dusta kabawos saruron, prade wenten manggihin maling tan nyadokang ring prajuru i krama punika patut kapakelingin olih i prajuru, jantos ping tiga melaksana asapunika wenang sang mapailon punika kasukserah ring sang ngawewenang.
- (7) Prade wenten jatma ngarereh reramon minakadi daun kelapa, busung miwah sane siosan yan tan wenten pasadok ring sang nruwenang wit prade kacunduk /katara patut keni dandaning maling.
- (8) Yening wenten jatma pangarah utawi ngranjing kapakubon wiadin pakarangan jatma tiyos ritatkala suwung, mawastu sang madruwe karang kaicalan, wenang jatma inucap katuwekang antuk madewa saksi ring Pura Bale Agung.
- (9) Mangda tan katuwekan manut sakadi ring ajeng, asing-asing ngaranjing kapakubon jatma tiyos patut :
  - ha. Matenggeran suwara (Makaukan);
  - na. Nyantos sang nruwenan karang uning;
  - ca. Masadok ring pangapit pinih tampek maka babuat pangeranjinge tur pamedal karangnya kadagingin sawen, makacihna pangarah rikala suwung

## Kaping 6

### Panyanggran Banjar

#### Pawos 34

Krama Desa/Banjar rikala ngawentenan suka duka/panca yadnya wenang kasanggra olih krama Banjar :

ha. Prade wenten pinunas sinalih tunggil krama banjar rikala mayadnya :

- 1) Yan I Krama Desa/Banjar punika ngawangun karya minakadi Dewa Yadnya, Manusa Yadnya, Butha Yadnya, I Krama Desa/Banjar nyanggra ( Makarya)
  - 2) Prade ngawangun karya Pitra Yadnya, Krama Banjar nyanggra apuputan karya sajawanin wenten pinunas tiyos sakeng sang ngawangun karya.
  - 3) Prade Krama Banjar mekarya sakeng semeng jantos sore patut sang madruwe karya ngaturin pangu ping kalih ring ida dane Krama Banjar.
- na. Pangrombo utawi makarya gotong royong ring sakuwuban Desa Pakraman Madangan Kaja kasangra olih krama Banjar.

**CATHURTAS SARGAH**  
**SUKERTA TATA AGAMA**  
**Palet 1**  
**INDIK DEWA YADNYA**  
**Pawos 35**

- (1) Palinggih panyiwian Sawidangan Desa Pakraman Madangan Kaja luire:
  - ha. Kahyangan Tiga
  - na. Pura Gunung Mertha
  - ca. Pura Ulun Suwi
  - ra. Pura Melanting
- (2) Piodalan ring soang-soang panembahan Kahyangan inucap sakadi ring sor puniki :
  - ha. Pura Desa, Pura Puseh (Panataran Agung) rikala purnamaning Kapat nyabran Dasa Warsa ngemargian masapuh agung;
  - na. Pura Dalem Rikala Anggara Kasih Medangsia;
  - ca. Pura Gunung Mertha rikala Anggara Kasih Julung Wangi ;
  - ra. Pura Masceti rikala Budha Wage Klawu;
  - ka. Pura Ulun Suwi rikala Purnamaning Karo;

- da. Pura Melanting rikala Budha Wage Klawu.
- (3) Pangaci ring Pura inucap manut kecap sastra agama, saha kalaksanayang manut nista, madya, utama manut kawentenan lan pararem.
- (4) Pangempon soang-soang Pura manut dresta kadi ring sor :
- ha. Pura Desa, Pura Dalem, Pura Panataran Agung kaempon olih krama Desa ngarep;
  - na. Pura Gunung Mertha miwah Pura Masceti kaempon olih krama Desa Marep;
  - ca. Pura Ulun Suwi kaempon olih krama Subak Gunung Jimbar;
  - ra. Pura Melanting Kaempon olih krama Desa Ngarep.

### Pawos 36

- (1) Ring soang-soang Pura inucap kaadegang Pemangku manut dudonan :
- ha. Katurunan utawi ngawaris;
  - na. Kacatri olih krama Desa;
  - ca. Nyanjan ring natar Pura sane pacang kaadegang pemangku;
  - ra. Ngemargiang Lekesan.
- (2) Tan wenang angge Pemangku luwire :
- ha. Cedaangga;
  - na. Sang sapa sira ugi sane tan kapatutang manut pararem minakadi :
    1. Jatma Buduh;
    2. Jatma Ayan, sakit ila, jatma babinjat;
    3. Sane tan Madruwe kasucian urip.
- (3) Parabea Kapamangkuan :

ha. Adhiksa Widhi (ngawintenang) kamedalin saha kalaksanayang olih sang ngadegang, makadi krama desa utawi krama pangempon pura soang-soang;

na. Mapitra Yadnya riwekas krama desa patut :

- 1) Prade pamangku Kahyangan Tiga miwah pemangku Desa lebar/seda patut kapalebong premangkin manut padewasan tan wenang kapendem;
- 2) Upakaranya kaingkupin olih krama desa tur pamargine sawa prateka ngantos nganyut.

(4) Pemangku patut ngamanggehang sesananing pamangku manut sastra agama luwire :

ha. Ambek dharma sadhu;

na. Asewaka Dharma, makadang sastra Utama;

ca. Tan parek ring naya dustha;

ra. Tan atayub ring tarub camara yuda;

ka. Tan manjing ring umah wong banija karma;

da. Tan manjing ring umah wong drati krama;

ta. Tan pati pikul-pikulan;

sa. Tan pati salah suluh;

wa. Tan anginum asing angawe mada;

la. Tan griganing wong akweh;

ma. Tan keneng cuntaka ring wong akweh sajawanin kulawarganya tunggil natah utawi pasiwannya manut dresta;

ga. Tan wenang ajajuden miwah sane tiyosan;

nga. Tan wenang anayub upadrawaning cor yan mawiwahara teka wenang adewa saksi.

- (5) Prade Mamurug wenang pamangku anyepuhin raga kasaksiang olih prajuru. Yan pacang ngalap rabi wenang ngaturan rumahun pawintenannya ring pura genahnya madeg pamangku nguni, wawu wenang ngalap rabi. Riwus upacaranya wenang ngewana wasa selaminya atahun, wus punika wawu mawinten sekadi pawintenan nguni sareng rabi.
- (6) Swadharmaning pamangku luwire :
- ha. Ngenterang upacara piodalan ring kahyangan miwah ring soang-soang pakubon krama;
  - na. Prade sinalih tunggil pamangku kapialang utawi cuntaka kengin nguntap pamangku khayangan tiga tiyosan utawi nuwur sang sulinggih;
  - ca. Samaliha yan pamangku sampun kadung ngayah ring pura kancit wenten kalayu sekaran, pamangku tan keneng cuntaka sakewanten pamangku tan budal salami piodalan;
  - ra. Pamangku tan keneng cuntaka, sajawaning kulawarganya tunggil natar utawi pasiwanya.

### Pawos 37

Patiyas utawi olih-olihan pamangku luire :

- ha. Pahtigaan (1/3) sarin canang ring pura sane kaempon;
- na. Tigang pampatan (3/4) saking upon-upon palaba pura sane kakaryanin;
- ca. Pahtigaan (1/3) saking olih-olihan mapinunas panebus tirta rikala matiwa-tiwa;
- ra. Luput pakaryan, rerampen/ reramon, parum sajawaning pinunas krama;
- ka. Padagingan minakadi jinah, beras, kelapa, adeng, minyak, ketan, ayam, keni sekadi patut;
- da. Patiyas sewosan manut pararem.

### Pawos 38

(1) Pamungku kagerosin rintukan :

ha. Seda;

na. Pinunas ngaraga manawi kageringan lan sapanunggalnya;

ca. Kawasang olih krama desa sangkanin nilar sasana;

ra. Prade pamungku kawasan sangkaning malaksana nilar sasana patut keni pamidanda manut pararem saha ngawaliang prabla pawintenani pecak.

### Pawos 39

(1) Kasukertan Kayangan kadi ring sor :

ha. Tan kalugra ngaranjing ka pura luire :

1) Sang katiben cuntaka, sebel kandel ring raga

2) Makta bebaktan sinanggih ngaletihin.

3) Sato Agung, sajawaning rikala mapada

4) Mabusana tan mamut kadi tata caraning ngaranjing kapura sadereng polih wakan saking prajuru desa,

5) Mobot tanpa lanang (Mitra Ngalang), jatma babinjat sadereng maprayas cita.

na. Yan wenton mamurug kocap ring ajeng, keni pamidanda manut pararem saha parayascita mamut kocapin sastra agama.

(2) Pratingkahi tan wenang ring pura :

ha. Masumpah sajawaning pitaduh Prajara Desa utawi sang ngawawenang;

na. Mawariti, Mahacin, Macocopin, Masanggama, Makoletan' dados asiki lanang wadon, majangilan/majajud, walpatusya, nyungsang busana sejawanin sulinggih lan pigina, Menchin Pusungga, seantukan purika rikala majajahitan pura magelang busung macangger lidinya;

ca. Mungguh tedun palinggih sajawaning pituduh prajuru.

- (3) Prade wenten sinalih tunggil krama mamurug kecap pawos ring ajeng, patut sang malaksana kakenenin pamidanda manut pararem saha pamrayas cita.
- (4) Prade wenten krama sane ngambil utawi nuduk druwen anak liyan ring pura wiyadin banten masilur, patut sang nuduk wiadin banten masilur masadok digelis ring prajuru utawi pamangku pura.

#### **Pawos 40**

- (1) Yan wenten jadma karawuhan ring pura utawi upacara ring umum, mangda kacihnayang antuk kasiramin toya kumkuman suci, pradene belus macihna tan kalinggihin Dewa/Widhi.
- (2) Pradene wenten asapunika sang karauhan kadanda manut pararem.

#### **PALET : 2**

#### **INDIK RESI YADNYA**

#### **Pawos 41**

- (1) Sang pacang madeg Pandita, Pinandita minakadi Balian Sonteng, Dalang, sakaluwiring jagi ngenterang yadnya patut masadok ring prajuru desa kalih ring Parisada Hindu Dharma Indonesia.
- (2) Prajuru Desa patut supeksa tur nitenin parade wenten kacihnasan sasar kakecap miwah drestane, tur sareng nyaksinin upacara saha nyobyahang ring paruman desa tegap rawuhing wates kawenangannya/pangenter yadnya.
- (3) Krama Desa Patut ngaturang ayah sapamadeg miwah ring pangalepas sang pandita riwekas katuntun olih prajuru Desa. Sajawaning pemangku sane muputang wali, krama desa patut nuwur anak lingsir/padanda jagi pacang muputang wali, ageng alit waline manut pararem krama.

Palet : 3

## INDIK PITRA YADNYA

### Pawos 42

Pamargin Pitra Yadnya madudonan manut sekadi ring sor:

Upacara sang kalayu sekaran :

- (1) Antuk Mendem utawi ngeseng makacihna makingsan ring ibu pertiwi utawi ring Geni salami nuptupan prabiya;
- (2) Mekingsan ring geni kadadosan, sabinaning pasah, kajeng kliwon, purnama tilem lan wenten odalan ring Kahyangan Tiga;
- (3) Atiwa-tiwa upakara pengabenan (Palebon) upacara pitra yadnya riwusan pangabenan ngeraris munggah daun bingin utawi ngeroras manut dudonan Atma Wedana.

### Pawos 43

Swadharmaning lan tategenan krama prade wenten sinalih tunggil krama kelayu sekaran :

- ha. Sang kaduhkitan patut nyadokang ring Klijan Banjar tur nunas tetimbangan ring kawentenanya;
- na. Ngaturin krama Banjar ngarombo makarya eteh-ete sawa nganter kasetra tur katuran panyembrahma canang sesidan-sidan;
- ca. Swadharmaning Banjar :  
Klijan Banjar maritatas pemargin sang kaduh kitan, napi ke pacang kapendem, makingsan riin napike lantur kaabenang, prade kapendem, raris kulkul pamitahu utawi kaarahang olih sinoman.
- ra. Panyanggran Banjar selanturmyane ;
  - 1) Soang-soang Krama Banjar patut nedunan patas kalayu sekaran minakadi beras, base a ampin, jinah manut pararem;

- 2) Ngarombo ngaryanin eteh-ete sawa kasanggra olih krama sane rawuh;
- 3) Sami krama banjar nganter kasetra jantos pamendeman puput, tan kengin ngalelet langkungan ring pitung (7) rahina tur patut polih pagebagan paetangan klian banjar.

#### Pawos 44

- (1) Jatma sane tan kalugra mamendem sawa kalih ngaben ring setra desa Pakraman Madangan Kaja sekadi ring sor puniki :
  - ha. Jatma sane maagama tiyosan ring agama hindu;
  - na. Krama tamiu/penumpang sane nenten makrama adat ring Madangan Kaja;
  - ca. Jatma sane nenten nganutin makrama adat ring Madangan Kaja.
- (2) Sane inucap ring aksara na lan ca ring ajeng kadadosan mamendem sawa miwah ngaben ring setra Desa Pakraman Madangan Kaja risampune polih panugrahan saking prajuru adat tur jatmane punika patut nawur penanjung batu manut pararem.

#### Pawos 45

- (1) Tan Kalugra (Larangan) mamendem sawa manut dresta Madangan Kaja luire :
  - ha. Nginepang bangbang ring setra;
  - na. Wali ring pura panembahan ngawit tedun ngayah;
  - ca. Tan dados nyuluban sawa rikala pamengpeng wali;
  - ra. Penemayan rerainan Galungan, Kuningan, Nyepi, Kajeng Kliwon, Purnama, tilem, semut sedulur, kala gotongan, Was panganten, prewani, pasah, soma manis, Tolu, Uncal balung, Ingkel Wong, Ingkel Wong jejepan, Lutung Megelut;
  - ka. Mamendem ngurug tigang sawa yadin kakalih yaning lanang istri;

da. Yan prade wenten anak alit sane seda sadereng maketus patut kapendem premangkin tan ngetang dewasa.

- (2) Sang sapa sira ugi pacang mamendem sawa patut ngadungang babawos pinih rihin ring prajuru sadereng nunasang ring siwa (sulinggih sane ngentas)
- (3) Nyulubang (mamaling) ngingsanang sawa ring setra kadadosang nanging :  
ha. Dados mandus ngereka nanging sareng kulawarganya.  
na. Mamargi mendem rikala wengi.  
ca. Tan ngetang dewasa pamargi sajawaning wali.  
ra. Krama Desa/Banjar tan keni cuntaka sajawaning pangarep (saking kapurusuan) miwah pangapit.
- (4) Sapa sira ugi krama desa/banjar mamendem sawa tan kelugra makarya gagumuk antuk semen, batu bata, miwah sekancannya.
- (5) Jatmane sane padem/seda nandang sakit ila, sawan ipun patut kabasmi ring setrane sane kapatutang olih krama adat utawi prajuru.
- (6) Jatmane padem/seda salah pati, ulah pati, sawan ipun dados kabuat budal olih sang madruwe sawa punika tur dados kaprateka sekadi patut nanging kawewehin antuk banten pangulap (panebusan) prayascita durmanggala.
- (7) Tan kalugra mamendem sawa ring pakarangan, tegal, carik yan prade wenten malaksana mamendem sakadi kecap ring ajeng, sang malaksana patut kadanda manut pararem tur ngingsirang mendem sawa punika kasetra saha kadulurin pamrayascita ring genahe punika manut panugrahan sang sulinggih. Siosan setra adat Madangan Kaja tan kalugra makarya setra/kuburan malih ring wawidangan Desa Pakraman Madangan Kaja.
- (8) Ngentasang sawa ring carik, tegal, kapatutang sakewanten manut pituduh prajuru desa wiyadin prajuru subak, nanging sang ngentasang sawa patut merascita tanah sane kamarginin.

(1) Pamargin atiwa-teiwa/ngaben :

ha. Ngaben/Palbon dadakan dados kamargiang sajeroning pitung rahina ngawit padem/seda nanging anutang ring pamargi dresta ping kalih panugrahan ida sang sulinggih sane pacang muputang agung alit upakaranya kasangra olih banjar saha polih patus banjar sawawaning wenten pinunas tiyos ring krama utawi prajuru.

na. Ngaben kinembulan kalaksanayang mawit saking panugraha Parisadha Hindu Dharma indik padewasan, nanging wenang pilihan manut dresta, saha kasangra olih krama banjar pangarep lan balu angkep tur polih patus saking krama banjar.

ca. Pangabenan sane kamargiang ring Desa Pakraman Madangan Kaja :

ha. Sawa prateka, pangabenan wenten cihna sawa;

na. Sawa Resi, Pangabenan mararapan ngagah tur ngadegan Sawa Resi;

ca. Nywasta, Pangabenan mararapan sawa tan kakeniang, ngadegang imba lalang utawi toya

(2) Prade wenten anak padem/seda risampun matur piuning maduluran antuk tebusan guru piduka ring pura dalem tur kalugra kapendem patut kapelebonang olih sang maderbe kapatutan sakewanten upakaranya kasangra olih krama tempekan banjar manut paetangan prajuru.

(3) Prade wenten krama banjar katiben sakadi bawos ring ajeng tur kantung madruwe papendeman sawa ring setra patut kapelebonang sinarengan.

(4) Prade wenten sinalih tunggil krama sane mamurug (piwal) kecaping ring ajeng kasisipang olih krama desa/banjar saha keni pamidanda manut pararem tur ngamanggehang caru Resi Gana ring setra.

- (5) Yan wenten anak padem keabenan ring banjar tiyosan sadurung polih pamutus krama, tan kadadosan.

#### Pawos 47

- (1) Pacaruan/Pangeresiganaan ring setra :
- ha. Pacaruan/pangeresiganaan ring setra kamargiang risampune tigang rahina ngantos roras (12) rahina saking pamargi rahina pangutangan/palebun saha upakaranya katangga olih sang ngamargiang atiwa-tiwa soang-soang;
  - na. Yan prade wenten anak padem/seda sadereng ngresigana/macaru ring setra patut kapelebonan dadakan antuk kulawarganya tur karyanya kasanggra olih banjar saha olih patus.
- (2) Upakara (babantenan) sane katur ring pura kahyangan tiga rikala ngagah sawa luwire :
- ha. Ring pura dalem suci asoroh saha runtutannya nasi gibungan (Pasegeh) segeh agung masalaran kerep miwah nganutin sawa;
  - na. Ring Pura Penataran (Puseh) suci asoroh, segehan;
  - ca. Ring Pura Bale Agung suci asoroh, pasegeh segehan;
  - ra. Ring Prajapati, suci asoroh, pasegeh segehan;
  - ka. Upakara (babantenan) miwah salaran sane ring dalem dados kabakta budal olih sang nruwenang karya, sakewanten katuku antuk jinah manut paetangan ring paruman krama desa miwah prajuru.
- (3) Rikalaning pangutangan/palebun krama sane mayadnya (Ngaben) patut :
- ha. Nunas tirta ring pura kahyangan tiga manut sawa;
  - na. Sesari sane kawastaning panebas tirta ring kahyangan tiga katawur rikalaning paruman desa/banjar;

- ca. Upakara (banten) nunas tirta kakaryaning olih prajuru/pemangku kahyangan tiga.
- (4) Bacakan jatmane sane patut wiyadin tan patut kaupakara ngaben luwire :  
 ha. Rare sadurung tigang sasih tan patut kaabenang;  
 na. Rare sampun mayusa tigang sasih sadurung maketus patut ngalungah;  
 ca. Sakeng maketus ngantos selantur ipun patut kaabenang/palebunan.
- (5) Yan wenten jatma tiyos sakeng krama Desa Pakraman Madangan Kaja pacang mapitra yadnya ring sajeroning desa pakraman Madangan Kaja patut kakenenin pananjung batu kueh ipun manut pararem tur manut sawa saha nangga prabiya pacaruan ring setra tur tan polih duman banjar.
- (6) Cuntaka/sebelan pangabenan mawit saking atur piuning madulurin tebasan guru piduka ring pura dalem ngantos ngaturan pacaruan (ngeresigana) ring setra.

**Pawos 48**

- (1) Krama banjar tedun makarya limolas (15) rahina sadereng yadnya, rarincikan karya sakadi dasa (10) rahina kaambil anggen gotong royong lanang wiadin istri, makarya rompok wiyadin makarya sanggah yadin matanding manut kaperluan ring sang mayadnya, 5 (limang) rahina sadereng yadnya krama banjar kaepah manut sang ngarepin yadnya saha makta patus ring genahnya kaepah soang-soang.
- (2) Patus pangabenan miwah kalayu sekaran luire:  
 ha. Ngaben ngamasa miwah ngaben dadakan, beras, adeng/taluh, kelapa, gesing, klangсах/klabang manut pararem;  
 na. Ngaben dadakan pateh sakadi patus seda/kapademan.
- (3) Krama Desa tan kawenangan sakadi ring sor :  
 ha. Ngarusak pamargi sang mayadnya;

na. Ngarap watangan;

ca. Miwah sane siosan.

- (4) Ajengan banjar (patas) polih wantah ping kalih, tiosan ring punika manut kawentenan sang madruwe karya.
- (5) Pasangan banjar luire 5 (limang) rahina ngantos karya, tiosan ring punika manut kawentenan sang madruwe karya anutang ring pararem.
- (6) Tan kalugra ngelaksanayang cremation (crematorium) sejawanin mekingsan di geni, sakit ila lan wenten pamutus paruman desa manut pararem.

#### Pawos 49

- (1) Pamargine kasetra rikala yadnya (Pangutangan) :
  - ha. Sane patut riinan wiadin pungkuran manut pituduh Prajuru;
  - na. Risampune rauh ring setra, wadah utawi joline genahnya kaenter olih prajuru Desa Pakraman Madangan Kaja;
  - ca. Sapa sira ugi sane mamurug kecaping ring ajeng, keni pamidanda manut pararem.
- (2) Tan kalugra atiwa-tiwa (ngaben) rikala krama Desa/Banjar Adat madangan Kaja ngawangun utawi ngajum palinggih Kahyangan Tiga ngawit saking ngeruwak jantos sida puput maplaspas;
- (3) Genah Bale Lunjuk ring setra kaenter olih Klian Banjar.

#### Pawos 50

- (1) Sane kasinanggeh cuntaka sekadi ring sor :
  - ha. Cuntaka antuk kelayu sekaran;
  - na. Cuntaka antuk ngeraja sewala/ngeraja singa;
  - ca. Cuntaka antuk ngembasang Putra;

- ra. Cuntaka antuk karuron;
- ka. Cuntaka antuk sakit ila;
- da. Cuntaka antuk pawiwahan;
- ta. Cuntaka antuk gamia gemana;
- sa. Cuntaka antuk salah timpal/karma;
- wa. Cuntaka antuk yaning wenten anak istri mobot nenten kaupakarayang pabiyakala miwah pawidiwidana;
- la. Cuntaka antuk mamitra ngalang;
- ma. Cuntaka yening wenten anak istri ngamedalang putra sadurung maupakara (Pakala-kalan alit tur pawidiwidana);
- ga. Cuntaka antuk sad tatayi.

(2) Sengker cuntaka manut kawentenanya :

- ha. Cuntaka kalayu sekaran, cuntakanya manut sekadi loka dresta miwah sastra Dresta desa soang-soang;
- na. Cuntaka ngeraja suwala 3 rahina ngawit saking ngeraja swala utawi jantos sampun tinas tur bersih.
- ca. Cuntaka antuk ngembasang putra 42 rahina (abulan pitung rahina) ngawit saking putrane embas utawi ngantos sampun kaupakarayang makekambuhan tur maparayascita manut sastra Agama, lanang wiadin istri
- ra. Cuntaka karuron cuntakanya abulan pitung rahina (42 rahina ) tur sampun matirta maperascita.
- ka. Cuntaka sakit ila /buduh,risampun kasinanggeh waras;
- da. Cuntaka pawiwahan, cuntakanipun ngantos sesampune matirta pabyakala;
- ta. Cuntaka gamia gemana, cuntakanipun ngantos sampun kapalasang tur sampun kawentenang pamerascita raga tur sampun kawentenang pamerascita desa;

- sa. Cuntaka salah timpal kapuputang manut sastra Agama Hindu;
- wa. Cuntaka antuk mamitra ngalang, cuntakanipun ngantos kawentenang upakara pabyakala;
- la Cuntaka yaning wenten anak istri ngamedalang putra sadurung maupakara ( pakala-kalaan alit tur pawidi widana ), cuntakanya ngantos wenten sane meras sang putra ;
- ma. Cuntaka yaning wenten anak istri mobot nenten kawentenang Upakara pabyakala, Cuntakanya ngantos kawentenang pabyakala ;
- ga. Cuntaka sad tatayi, cuntakanipun ngantos sampun maperayascita raga tur nenten pisan dados ngemungganghang upakara padwijatian.

(3) Cuntaka kalayu sekaran/kapademan :

ha. Yaning kapendem cuntakanya :

1. Cuntaka/sebel krama banjar rawuhing 3 rahina sampun wusan mendem utawi sampun masasapuh.
2. Kulawarganya sajeroning pakarangan ngantos roras (12) rahina utawi manut dresta.

na. Kaaben cuntakanya :

Sang nyambut karya pitra yadnya, cuntakanya ngawit saking nanceb wiyadin ngoreng ngantos puput nglaksanayang yadnyane (mapegat/ngaturan guru piduka) ngantos nyapuh bangbang roras (12) rahina.

(4) Sane Katiben cuntaka luwire :

ha. Kalayu sekaran sane kacuntaka :

- 1) Sang sane kelayu sekaran;
- 2) Kulawarganya;
- 3) Krama banjar.

na. Ngraja swala sane kacuntaka :

- Sang sane ngraja swala

ca. Ngembas putra sane kacuntaka :

- Kulawarganya sane ngembasang putra lanang wiadin istri.

ra. Pawiwahan sane kacuntaka :

- Sang sane ngelaksanayang pawiwahan lanang wiadin istri.

ka. Sakit ila, Buduh :

- Sane kacuntaka raganya dewek.

da. Karuron sane kacuntaka :

- Kulawarganya lanang utawi istri.

ta. Gamia gemana sane kacuntaka :

- 1) Sang sane ngelaksanayang gamia gamana;
- 2) Desa Pakraman nyane.

sa. Salah timpal sane kacuntaka :

- 1) Sang sane melaksana salah timpal;
- 2) Kulawarganya;
- 3) Desa Pakraman/ Prahyangan.

wa. Anak istri mobot nenten kawentenan upacara pabiakaonan sane kacuntaka:

- Sane maraga istri (Sane mobot)

la. Mamitra ngalang sane kacuntaka :

- Sane Ngalaksanayang Mamitra ngalang inucap.

ma. Ngembas Putra nenten kawentenan upakara pabiakaonan miwah upakara pawidi-widana sane kacuntaka :

- 1) Sang sane ngembasang putra;
- 2) Putra sane embas.

ga. Sad Tatayi sane kacuntaka :

- Sang malaksana sad tatayi.

- (5) Tan keneng cuntaka luwire : Sang sulinggih (Pandita) lan mangku (Pinandita) sajawaning naben ida lebar utawi pasiwan sira mangku.

#### Palet 4

### INDIK MANUSA YADNYA

#### Pawos 51

- (1) Manusa Yadnya inggih punika upacara-upakara dharmaning kahuripan manusa, ngawit saking patemoning kama bang kalawan kama petak sajeroning garbha ngantos kalayu sekaran riwekas.
- (2) Upacara ring ajeng madudonan sakadi ring sor :
- ha. Magedong-gedongan duk pangerempinian ibiyang (garbadana);
  - na. Duk sang kama reka medal (Jatakarma);
  - ca. Kepus Odel;
  - ra. Roras rahina;
  - ka. Tutug kambuhan asasih pitung rahina (42 rahina);
  - da. Nigang Sasihin (3 bulan/Niskarmana);
  - ta. Pawetuan/otonan/odalan (6 sasih);
  - sa. Tutug kelih (ngraja sewala wadone, Ngembakin lanange);
  - wa. Matatah/mesangih;
  - la. Pawiwahan;
  - ma. Pawintenan.
- (3) Upacara-upakara inucap ring ajeng nista, madya, utama manut sastra Agama lan dresta Desa Pakraman Madangan Kaja;

Palet 5

INDIK BUTHA YADNYA

Pawos 52

- (1) Bhuta Yadnya inggih punika upacara-upakara byakala ring pratiwi lan Kahyangan, sarwa prani saha upacara-upakara ring babuthan miwah ring piranti siosan..
- (2) Upacara pabyakala ring sarwa prani, sarwa tumuwuh muwang piranti, luwire :
  - ha. Ring sarwa lelandep rikala Saniscara Kliwon wara Landep;
  - na. Ring sarwa tumuwuh lan piranti rikala Saniscara Kliwon wara Wariga;
  - ca. Ring sarwa syandana/wahana rikala Saniscara Kliwon wara Kuningan;
  - ra. Ring sarwa lelanguan rikala Saniscara Kliwon wara Krulut;
  - ka. Ring sarwa ingon-ingon/wewalungan rikala Saniscara Kliwon wara Uye;
  - da. Ring sarwa ringgit, ukir-ukiran rikala Saniscara Kliwon wara Wayang.
- (3) Upakara pakalan kalan manusa manut wiguna kabawos pabyakala.
- (4) Upacara Pabyakala ring pratiwi, Khyangan lan Babuthan kawastaning macaru.
- (5) Pacaruan inucap ring ajeng nista, madia, utama, manut wiguna kadi ring sor :

ha. Eka Sata	ra. Panca Kelud
na. Panca Sata	ka. Resi Gana
ca. Panca Sanak	da. Tawur Agung
- (6) Sajawaning kadi ring ajeng, kawentening upakara :
  - ha. Majot-jotan utawi yadnya sesa nyabran wusan ngarateng;
  - na. Masapuh-sapuh rikala pacang wali ring pura;
  - ca. Pacaruan pasasihan kalaksanayang pramangkin ngawit sasih ka 5, 6, 7, 8, lan ka 9 sajawanin wenten durbiksan jagat.

### Pawos 53

- (1) Ngangken ngawarsa rikalingin tilem kasanga kawentenan tawur kasanga, kalanturan antuk ngarupuk, maka cihna pacang mapag rahina panyepian benjangne.
- (2) Ring paumahan utawi pakubon soang-soang krama;  
ha. Mabyakala raga;  
na. Macaru ring lawang-lawang manut panugrahan parisadha utawi pamangku Kahyangan Tiga.
- (3) Brata panyepian sane kamargiang olih krama desa/banjar adat Madangan Kaja:  
ha. Amati Geni, tan kengin maapi-api;  
na. Amati karya, tan kengin nyambut karya;  
ca. Amati lelangan, tan kengin maoneng-onengan maswara gora, lan sapanunggalannya.  
ra. Amati lalungan, tan kengin malancaran.
- (4) Pabratan inucap kamargiang sakeng semeng ngawit masuara kulkul ngantos semeng benjangne.
- (5) Sang sapa sira ugi mamurug kecap ring ajeng keni pamidanda manut pararem saha kamargiang olih patelik (Pacalang Desa).
- (6) Riwus rahina Nyepi maka cihna pangawit Isaka Warsa, soang-sonag warga desa patut ngamargiang Dharma Santi.

**PANCAMA SARGAH**  
**SUKERTA TATA PAWONGAN**  
**Palet 1**  
**INDIK PAWIWAHAN**  
**Pawos 54**

- (1) Pawiwahan inggih punika, patemon purusa kalawan predana melarapan panunggalan kayun suka lila kadulurin upasaksi sekala niskala.
- (2) Pamargin pawiwahan luwire :
  - ha. Papadikan, kamanggala antuk pakrunayan;
  - na. Ngerorod, marangkat riin sangkaning pada seneng wawu kakrunayang;
  - ca. Nyeburin utawi sentana nyeburin (risampun nganutin upakara pamerasan sepatutnya).
- (3) Pidabdab sang pacang mawiwaha patut :
  - ha. Sampun manggeh daha taruna (prasida nganutin undang-undang);
  - na. Sangkaning pada rena/lila (tan kapaksa);
  - ca. Manut kecap sastra agama (tan gamia gemana).
  - ra. Kasudi widani prade pangambile tiyos agama utawi kaparisuda prade pangambile bina wangsa.
- (4) Pawiwahan sane kapatutang ring Desa Pakraman Madangan Kaja sekadi ring sor :
  - ha. Sampun kamargiang pabyakala utawi pasakapan, kasaksiang sakala niskala olih pandita utawi pinandita ( Pemangku, Balian Konteng);
  - na. Wenten pasaksi prajuru sane ngilikitayang pawiwahan nyane;
  - ca. Pawiwahan inucap patut kalikitayang ring sang ngawawenang (Kantor Catatan Sipil);
  - ra. Sampun matengeran masuara kulkul;
  - ka. Sapa sira ugi parabian (Pasakapan) Tan manut kadi kecaping ring ajeng, sinanggeh tan patut (tan sah).

#### Pawos 55

Tata caraning parabian patut sakadi sor :

- ha. Sapa sira ugi pacang ngawarangang pakulawarganya patut masadok ring Prajuru/Dulu-dulu, salanturnya Prajuru/dulu maritatas manut tan manut kacaping tata cara parabian;
- na. Pamargi papadikan manut dresta makadi dudonan :
- 1) Pakrunayan jantos ping tiga, saha soang-soang malarapan :
    - ha. Kapertama antuk canang;
    - na. Kaping kalih antuk canang pangrawos, lanjaran ring sajeng;
    - ca. Kaping tiga antuk tipat bantal kabawos pamuput.
  - 2) Risampun puput raris sang istri kaajak budal ring pakubon sang lanang, saha kalanturang antuk pabyakala sapatutnya.
  - 3) Mangda puput tinas sakala niskala, raris kulawarga purusa miakta pajati (nawur panebas buat) ring pamerajan wadone wiyadin ring Kahyangan Tiga.
- ca. Prade ngarorod/marangkat patut :
- 1) Reraman sane lanang ngawentenang panglukuan (penyedek) antuk duta sakirangnya 2 (kalih) diri;
  - 2) Pagenahan antene tan kengin ring pakubon sang lanang sadereng mabyakala;
  - 3) Yan prade silih sinunggil krama ngorod patut sang madruwe pianak atur supeksa ring Prajuru.
- ra. Sajeroning pakrunayan/pangelukuan patut :
- 1) Kamanggala antuk geng pangampura arep ring rerama wadone;
  - 2) Kaigumang bawos indik pakidih utawi palemagan arep ring pasewakan;
  - 3) Prade tan terima pajati, pakrunayan kamargiang jantos ping tiga.

- na. Balu muani kapurusa boya sentana nyeburin miwah balu muani nyeburin (wit sentana):
- (7) Swadhamaning balu inucap patut :
- ha. Ngemanggehang patibrata tan kengin ngamargiang paradara/drati krama;
- na. Ngutsahayang waris pagunakaya, tan dados ngadol, ngadeang, makidihang lan siosan punika, sajawaning kabebasan olih pianak utawi kulawarga pinih tampek sakeng kurenannya prade pianak kantun alit-alit;
- ca. Kengin ngidih sentana prade wenten pidabdab sadurung silih tunggil padem saha kabebasan antuk pianak yan wenten, yan tan wenten pianak saking kulawarganya sakeng kapurusa;
- ra. Kawenangang mawiwaha malih, prade sampun polih kabebasan antuk pianak yan wenten, yan tan wenten, pianak saking kulawarganya purusa.

### Palet 3

## INDIK SENTANA

### Pawos 57

- (1) Sentana wenten kalih pawos luire:
- ha. Pratisantana inggih punika sentana sane metu saking pawiwahan kpatut;
- na. Sentana paperasan inggih punika sentana antuk ngidih santukan saking pawiwahan sane kpatut tan ngemetuang sentana malarapan antuk adung babawosan ring kulawarga purusa.
- (2) Ngemetuang sentana (pianak) tan malarapan antuk pawiwahan:
- ha. Prade wenten sentana (pianak) sane metu tur tan keangkenin kasengguh pianak babinjat;

- na. Prade wenten sentana (pianak) sane sampun metu sadereng ngalaksanayang pawiwahan kasangguh pianak astra.
- ca. Sentana (pianak) sakadi munggah ring kecaping ajeng patut kaprayascita/kaperas kundul anggen ngicalang cuntaka.
- (3) Meras santana manut dudonan luwire :
- ha. Makacihna upakara pamerasan saha kasinanggeh sekala niskala;
- na. Patut masadok ring Bendesa miwah kelian banjar tigang sasih sadereng pamerasan;
- ca. Bandesa/kelian banjar nyobyahang ring sawidangan desa sapa sire rumasa tan lila mangda nyadokang ring prajuru masengker kalih wuku (14 rahina) sadereng pamerasan kamargiang;
- ra. Prajuru desa digelis mawosin saha ngicenin pamutus manut ring desa miwah pararem;
- ka. Prade sultur pamerasan tan manut kecape ring ajeng, prajuru desa wenang ngandeg sang pacang meras saha ngicenin panuntun mangda kapuputang riin babawosane utawi wicarane, yan mabuat pisan prajuru desa wenang ngalanturang ring sang rumawos (Pengadilan Negeri).
- (4) Paperasan sane kapatut ring Desa Pakraman Madangan Kaja risampun:
- ha. Mawidi-widana paperasan;
- na. Kasaksinin olih prajuru Desa/banjar sane pacang ngelingang utawi ngilikitayang;
- ca. Kasobyahang ring wawidangan desane.
- (5) Sane kapatutang peras angge sentana kadi ring sor:
- ha. Maagama Hindu;
- na. Kulawarga saking purusa, prade tan wenten kengin sakeng wadon, yening taler tan wenten wawu kengin sakama-kama (saking kayun);

ca. Papernahan nedunang saking sang meras;

ra. Kengin ngangkat sentana langkung ring adiri lanang wiyadin istri.

#### Palet 4

### INDIK WARISAN

#### Pawos 58

- (1) Warisan inggih punika tetamian arta berana saha ayah-ayahan ngupadi kasukertan sekala lan niskala saking kaluhuranya arep ring turunannya.
- (2) Sane kasinanggeh warisan luwire :
  - ha. Duwe tengah makadi karang, carik, tegal, ayahan desa, Kahyangan, pusaka siwa upa karena;
  - na. Pamerajan;
  - ca. Pagunakayan, tadtadan/jiwa dana, hutang piutang
- (3) Wawu kengin kabawos warisan prade wenten :
  - ha. Sang mapiturun (pawaris);
  - na. Katurunan (ahli waris);
  - ca. Arta berana miwah tategenan (ayah-ayahan) makacihna warisan.
- (4) Sane kabawos Ahli waris luwire :
  - ha. Pratisentana purusa;
  - na. Pratisentana pradana (sentana rajeg);
  - ca. Sentana paperasan lanang utawi istri.
- (5) Prade tan wenten sekadi ring ajeng, kang sinanggeh ahli waris :
  - ha. Turunan purusa pernah ngunggahang, reramane misan mindon;
  - na. Turunan purusa pernah kasamping makadi kaponakan, misan miwah mindon.

## Pawos 59

- (1) Swadharmaning ahli waris :
  - ha. Nerima saha nguwasayang tetamian pahan saking kaluhuranya, mekadi ngerempon sanggah, pura saha pangupakaranya miwah nyaladihinin ayah-ayahana pawaris;
  - na. Ngabenan pawaris saha ngelanturang upacara pitra yadnya manut sastra agama;
  - ca. Nawurin hutang-hutang pewaris sane manut pangeloika.
- (2) Pah-pahan waris manut sakadi ring sor :
  - ha. Risampun kalaksanayang Pitra Yadnya lan hutang-hutang pawaris sampun buntas katawur;
  - na. Para ahli waris polih pahan pada.
- (3) Sinalih tunggil ahli waris kengin tan polih pahan prade :
  - ha. Nilar kawitan lan sesananing Agama;
  - na. Alpaka guru rupaka;
  - ca. Sentana rajeg kesah mawiwaha saking paumahanya utawi sentana nyeburin, soang-soang kabawos ninggal kadaton.
- (4) Boya ahli waris kengin muponin hasil manut dudonan luwire :
  - ha. Sentana luh salami dereng kesah mawiwaha utawi alpaka guru, miwah prade madrebe pianak tan kaangkenin olih wong tua rare inucap, kengin ipun ngawaris wantah pikolih pagunakaya sentana luh inucap kemawon;
  - na. Balu luh wiadin muani nyeburin muponin wantah pagunakayan kemawon;
  - ca. Mulih daha utawi taruna, riantukan ring pawiwahane pecak sampun palas kabawos ninggal kadaton.

- (5) Yan prade wenten jatma madruwe sentana (pianak) luh kewanten asiki mawastu pawiwahannya ninggal kadaton, reramannya tan kengin maweh jiwa dana (bekel tadtadan) mawit saking warisan leluhurnya.
- (6) Prade wenten jatma madruwe sentana (pianak) luh ngrawuhang anak muani tur sampun mapikurenan sakantun muanin ipun maurip tan kengin ngarawuhang anak tiosan malih anggen ipun kurenan.

#### Pawos 60

- (1) Anak muani nyeburin sentana luh tan dados ngarereh kurenan malih sadereng polih kabebasanang saking matua miwah kurenannya, ping kalih kaputusan saking sang rumawos (Pengadilan Negeri).
- (2) Yaning sampun kabebasanang antuk kecaping ajeng, anak muani punika kengin ngarereh rabi malih tur pianaknya polih warisan saking pianak kurenannya pecak.
- (3) Anak muani sane nyeburin sentana luh, prade padem matua miwah kurenannya nanging durung ngemetuang pianak, jatma muani punika kengin ngerereh kurenan malih yan sampun polih kabebasanang saking ahli waris purusa, nanging mangda muputan upakara – upakara pitra yadnya ring umahnya.
- (4) Anak muani nyeburin sentana luh, prade padem matua miwah kurenannya nanging sampun ngemetuang pianak, jatma muani punika kengin ngarereh kurenan malih, yan sampun polih kabebasanang saking pianaknya. Prade sadereng polih kabebasanang saking pianak ipun sampun malaksana, jatma muani punika dados katundung antuk pianaknya sajawaning wenten pasubaya.
- (5) Jatma muani sampun mapikuren tur sampun madrebe pianak raris nyeburin sentana luh, pianaknya sane sampun wenten pecak nenten polih pahan waris saking sentana luh sane keceburin sajawaning wenten pasubaya.

## Pawos 61

- (1) Jatma sane madrebe pianak luh wiadin muani, prade reramanya padem, pianak ipun luh sane durung makurenan polih pahan waris saking wewarisan reraman ipun.
- (2) Jatma luh makurenan ngajak pianak (tugtug pianak) pianaknya sane nutug punika patut polih waris saking guna kaya memen ipune sadereng makurenan.
- (3) Prade sajeroning pakulawargan wenten ahli waris langkung ring adiri patut :
  - ha. Kawentenan paigum indik pedum waris;
  - na. Prade tan prasida katunasang katimbangan ring prajuru, prade taler tan wenten cumpu ring panepas Kerta Desa lantur katunasang ring sang rumawos (Pengadilan Negeri).
- (4) Yan prade wenten karang ayahan putung (nyamput) prajuru niwakang ring :
  - ha. Sang sinaggeh waris manut ring ajeng;
  - na. Sang kengin anggen sentana manut ring ajeng;
  - ca. Desa kengin nunasang ring sang Rumawos (Pengadilan Negeri)

## SAD SARGAH

### WICARA LAN PAMINDANDA

#### Palet 1

### INDIK WICARA

## Pawos 62

- (1) Sane wenang mawosin lan mutusang wicara ring desa inggih punika :
  - ha. Prajuru desa sinanggeh kerta desa.
  - na. Prade sang mawicara tan cumpu ring pamutus Prajuru Desa kengin nunasang ring paruman Krama Desa.

- (2) Sahaning Wicara mawit saking kacorahan sakaluwir sinanggeh nungkasin daging awig-awig pasuara miwah pararem desa/banjar, prajuru patut digelis mawosin tan nyantos pasadok.
- (3) Sajaba wicara kadi ring ajeng patut nyantosang pasadok sang nunas bawos.
- (4) Panepase patut pastika nyantenang iwang ipun melarapan Tri Pramana (Saksi, Ilikita, Bukti) miwah tan maren nepek ring catur dresta (Sastra, Purwa, Loka miwah Dresta Desane).
- (5) Sahananing pamutus tan maren ngupadi :
  - ha. Mangda warga desane sayan pastika uning wawatesan iwang patute;
  - na. Mangda sang kawon tatas uning ring kaiwangan deweknya;
  - ca. Sang molih tan maren katutun mangda sampun bas nginggilang kapatutannya;
  - ra. Nyapsap bibit papinehe mamusuh-musuhan.

## Palet 2

### INDIK PAMIDANDA

#### Pawos 63

- (1) Desa/Banjar wenang niwakang pamindanda ring warga desa/banjar sane sisip.
- (2) Paniwak danda inucap kelaksanayang olih Bandesa/Kelian/Prajuru Desa.
- (3) Bacakan pamidanda luwire :
  - ha. Danda arta (dosa)
  - na. Ayahan panukun kasisipan;
  - ca. Upakara panyangaskara/nunas pangampura;
  - ra. Kanorayang makrama.

- (4) Pamidanda sane katiwakang patut masor singgih manut awig-awig, pararem, ping kalih kasisipannya. Jinah utawi raja brana pamidanda ngranjing dados druwen desa/banjar.
- (5) Saluwirin dadosan/paturunan/hutang matumbasan sane tan buntas katawur sajeroning pawanengan ipun, patut keni panikel amade (separo) saking dadosan paturunan, hutangnya sane katawur malih tigang rahina buntas.
- (6) Yaning risampune tigang rahina taler tan kataur buntas rawuh panikel malih kamargiang panikel ngulung sane patut katawur ring paruman pacang rawuh, prade rikala parumane punika tan katawur jantos langkung ping kalih paruman, krama punika wenang karampag.
- (7) Yan prade dadosan/hutang punika katawur buntas ring rahina parampagan rerampagan punika kawangdeyang.

#### Pawos 64

- (1) Tata cara ngamargiang rerampagan sakadi ring sor :
  - ha. Kalaksanayang olih Prajuru Desa/Banjar kasarengin olih krama tigang diri maka saksi ngarawuhin umah/puri sang karampas/karampag;
  - na. Sang ngerampag sangkanin darsana ngambil barang utawi nyawenin tanem tuwuh, akehnya manut ring hutangnya;
  - ca. Prajuru patut mateketang ring sang karampag mangda barang-barang sane karampag digelis katebus, masengker awuku (7 rahina) ring kutus rahina pacang kaadol;
  - ra. Yaning langkungan polih pikolih adolan saking hutang ipun langkungan pikolih punika kawaliang ring sang karampag;

- ka. Yan tan jangkep buntas hutang ipun saking barang-barang sane kaserahang sakadi rarampagan, kengin karampag druwen ipun tiosan.
- (2) Prade sang pacang karampag tan arsa nyerahang paderbenipun ring pelaksana perampagan mawastu sampun tan nganutin awig-awig Desa Pakraman Madangan Kaja wenang ipun kanorayang makrama desa/banjar salami ipun tan mrasidayang nawur hutangnya.
- (3) Nanging yan sampun prasida antuke nawur hutang/pamidanda inucap krama punika dados makrama malih saha maduluran nunas geng pangampura ring krama desa lan nawur pamogpog sasuwen ipun wusan makrama.
- (4) Sane tan wenang karampag luwire :
- ha. Saluwirin prabot pawon;
- na. Saluwirin prabot carik;
- ca. Ubuh-ubuhan suku pat sajawaning wenten pasubaya;
- ra. Barang sane patut inggilang manut agama;
- ka. Puri/umah.

## SAPTAMA SARGAH

### NGUWAH -NGUWUHIN AWIG – AWIG

Pawos : 65

- (1) Awig-awig puniki kengin kauwah uwuhin sasampun mamargi limang warsa masehi.
- (2) Sadurung mawaneng limang warsa masehi, yan prade wenten indik sane mabuat pisan awig-awig puniki kengin kauwah uwuhin sakewanten mangda kaingkupin sareng sami.
- (3) Saluwirin sane wenten saderengnya patut kaanutang ring sadaging awig-awig puniki.

- (4) Saluwirin sane durung kabawos sajeroning awig-awig puniki patut kalaksanayang manut tata cara sane sampun ketah mamargi kadulurin antuk pararem.

## ASTAMA SARGAH

### SAMAPTA

#### Pawos 66

- (1) Awig-awig puniki kararemin duk rahina Wraspati Umanis Wuku Dunggulan Pangelong ping Solas Sasih Jiyestha, Icaka 1921 tanggal masehi 10 Juni 1999, tur kaparipurnayang duk rahina Buda Pahing Kuningan Sasih Kalima pangelong ping lima, Icaka 1939 tanggal 8 Nopember 2017 ring Wantilan Jaba Pura Dalem Desa Pakraman Madangan Kaja.
- (2) Awig-awig puniki kalingga tanganin olih Bandesa Desa Pakraman Madangan Kaja, Kelian Banjar Madangan Kaja, kasaksinin olih Kelian Dinas Madangan Kaja, Perbekel Desa Petak, lan Camat Gianyar.
- (3) Luwir sang ngalingga Tanganin :  
ha. Kaparthama Prajuru Adat :

1. Bendesa Desa Pakraman Madangan Kaja

(I Nyoman Tempil)

2. Penyarikan

(I Wayan Suparta)

3. Petengen

(I Nyoman Arsa)


Kelurahan Banjar Madangan Kaja



(Wayan Tongos Pageh Giri)

na. Kaping kalih Prajuru Dinas pinaka saksi


1. Kelihan Dinas Banjar Madangan Kaja



(I. Wayan Suparta)



(I Ketut Mahardika)



3. Camat Gianyar

(I Ketut Suastika, S.Sos.)

NIP. 19611231 198103 1 074

Telah Dicatatkan di Dinas Kebudayaan Kabupaten Gianyar;

Pada tanggal : 15 Nopember 2017

Nomor : 12



Kepala Dinas  
Kebudayaan Kabupaten Gianyar

Drs. I Gusti Ngurah Wijana, MM. M.Pd.

Pembina Utama Muda

NIP: 19581231 198603 1 298